

**Jangan Salah Lagi Pilih Pemimpin - Awang Adek
Bernama
23 Ogos, 2011**

TANAH MERAH, 23 Ogos (Bernama) -- Rakyat Kelantan diingatkan agar tidak lagi salah memilih pemimpin pada pilihan raya umum akan datang demi masa depan negeri itu yang kini jauh ketinggalan daripada segi pembangunan dengan negeri lain, kata Timbalan Menteri Kewangan Datuk Dr Awang Adek Hussin.

Beliau berkata masa depan negeri itu tidak boleh diperjudikan kerana yang akan menjadi mangsa adalah rakyat yang hidup dalam keadaan daif tanpa pembelaan.

"Nak tahu bagaimana Kelantan ketinggalan atau tidak, lihatlah betapa ramainya rakyat negeri ini yang berhijrah ke luar untuk mencari pekerjaan.

"Kalau Kelantan ini maju seperti negeri lain sudah tentu penghijrahan yang begitu besar ini tidak akan berlaku seperti mana rakyat di negeri maju seperti Melaka, Johor dan Perak umpamanya," katanya ketika merasmikan pejabat baru Amanah Raya Berhad Tanah Merah di sini hari ini.

Awang Adek yang juga Timbalan Pengerusi Badan Perhubungan Umno Kelantan berkata kebijaksanaan mentadbir negeri terletak kepada pemimpin dan jika pemimpin yang ada gagal untuk memakmurkan negeri dan rakyat hidup dalam serba bermasalah, mereka (rakyat) dinasihatkan agar membuat pilihan bijak pada pilihan raya umum itu nanti.

"Lihatlah betapa rakyat Kelantan kini benar-benar terhimpit dengan pelbagai masalah seperti masalah air yang tidak pernah selesai-selesai dan lebih kecewa apabila pemimpinnya bagi tahu masalah air akan selesai di Kelantan dalam tempoh 17 tahun lagi dan ini sesuatu yang mengecewakan," katanya.

Beliau berkata masalah ketiadaan pelabur yang enggan membuat pelaburan di Kelantan juga perlu diambil kira kerana ia penting dalam memastikan ekonomi negeri itu dapat berkembang pesat seiring dengan negeri-negeri lain dan dapat mengelak masalah penghijrahan.

"Menteri Perdagangan Antarabangsa dan Industri, Datuk (Seri) Mustapa Mohamed membawa masuk pelaburan yang berbilion ringgit kepada negara kita tetapi masih gagal untuk kita memujuk mereka membuat pelaburan di Kelantan.

"Sudah-sudahlah kita duduk dalam keadaan begini dan Kelantan perlukan perubahan yang boleh diberikan oleh Barisan Nasional bagi mengubah semua senario ini," katanya.

Turut hadir Pengerusi Amanah Raya Berhad, Datuk Dusuki Ahmad yang kemudiannya turut menyerahkan zakat kepada kira-kira 100 fakir miskin.

-- BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsgeneral.php?id=609814>